

Evening Dogri News Bulletin,

12 October. 2025 .18:15 Hrs

Headlines

- मुख्मन्त्री उमर अब्दुल्ला होरें दिल्ली हॉफ मैराथन च हिस्सा लैता ते अजें तगर दा अपना सब्बनें थमां बेहतरीन प्रदर्शन कीता।
- उपमुख्मन्त्री सुरेंद्र चौधरी होरें आखेआ जे जम्मू-कश्मीर दा राज्य दा दर्जा बहाल करने लेई मेद हुन सुप्रीम कोर्ट थमां गै ऐ।
- अफगानिस्तान दे इलाके पर पाकिस्तान आसेआ कीती गेदी ब्हाई कार्रवाई मगरा अफगानिस्तान दी कार्रवाई च 58 पाकिस्तानी सैनिक मारे गए ते केइएंगी बंधक बनाया गेआ।
- बी.जे.पी नै राज्यसभा चुनाएं आस्तै 3 मेदवारें दी सूची जारी कीती।
- उधमपुर जिले दे समरोली इलाके च ल्हास-पस्सियां पौने करी केई सारे कारोबारी इदारें गी नुकसान पुज्जा।

<><><><><><>

CM Half Marathon

मुख्मन्त्री उमर अब्दुल्ला होरें अज्ज नमीं दिल्ली हॉफ मैराथन 2025 च हिस्सा लैता ते अजें तगर दा अपना बेहतरीन प्रदर्शन करदे होई अपनी द्रौड़ 1 घैण्टा 53 मिनट ते 35 सकैंटे च 5 मिनट 24 सकैंट फ्ही किलोमीटर दी रफ्तार बरकरार रखदे होई पूरी कीती। एहू जानकारी उमर अब्दुल्ला होरें एक्स पर इक पोस्ट च सांझी कीती। स्नेह मताबक मुख्मन्त्री उमर अब्दुल्ला होरें बडुलै 6 बज्जियै 53 मिनटें पर द्रौड़ पूरी करी लैती ही। एह्दे शा पैहले केंद्री मंत्री मनसुख मांडविया होरें वेदांता दिल्ली हॉफ मैराथन 2025 दे 20में संस्करण दा उद्घाटन कीता ह। इस मौके पर दिल्ली दे उपराज्यपाल वी.के. सक्सेना, सी.डी.एस जनरल अनिल चौहान ते नौसेना प्रमुख एडमिरल दिनेश के. त्रिपाठी होर बी मौके पर उत्थे मौजूद हे।

<><><><><><>

Dy-CM Statehood

उपमुख्यमंत्री सुरेंद्र चौधरी होरें मेद प्रगट कीती ऐ जे सुप्रीम कोर्ट जम्मू-कश्मीर गी परतियै एहदा राज्य दा दर्जा देने दे हक्के च फैसला लेइयै न्याऽ गी जींदा रक्खग। कल जम्मू दे भगवती नगर च हाड़ें सवां प्रभावित इलाकें च होए दे नुकसान दा जायजा लैंदे होई उनें मीडिया दे इक सोआल दा परता दिंदे होई आखेआ जे लोकें गी सुप्रीम कोर्ट पर पूरा भरोसा ऐ ते उनें इस फैसले थमां मेद दी किरण दी हीखी लाई दी ऐ। उनें अदालतै अगो गुजारश कीती ऐ जे ओहू लोकें दे दिलै दी धड़कन दी बाज सुनै, नां कि सियासतदानें दी ते इस मामले च दखल देयै। उनें आखेआ जे एहू फैसला जम्मू-कश्मीर च असेंबली चुनांऽ करोआना यकीनी बनाने लेई पैहले गै लेई लैता जाना लोड़चदा हा। उनें आखेआ.

<><><><><><>

Afghan Pak Clashes

तालिबान दे प्रवक्ता जबीहुल्लाह मुजाहिद होरें अज्ज आखेआ ऐ जे बेहरमपुर जिले च दुरंद लाइन कश जवाबी कार्रवाई च तालीबान नै पाकिस्तान दे घटोघट्ट 58 जवानें गी मारी मकाया ऐ ते 30 शा मते जवानें गी जखमी करी दिता ऐ। उनें पाकिस्तान गी चेतावनी दिंदे होई आखेआ जे हर हमले दा बरोबर परता दिता जाग। काबुल च इक प्रेस कांफ्रेंस गी संबोधित करदे होई प्रवक्ता मुजाहिद होरें पाकिस्तान पर आरोप लाया जे उनें अपनी धरती पर आई.एस.आई.एस आतंकवादिएं गी छपाए दा ऐ। उनें इस्लामाबाद गी पाकिस्तान च छपे दे आतंकवादिएं गी बाहर कडुने लेई आखेआ। तालीबान दे नेता हुंदे मुजब जेकर कोई बी उंदी मिट्टी उप्पर हमला करग जां उन्दे ब्हाई क्षेत्र दा उल्लंघन करोग, उसी सख्त कार्रवाई दा सामना करने पौग। मुजाहिद होरें आखेआ जे अफगानिस्तान दी फौज नै पाकिस्तानी सेना दी 25 चौकियें पर कब्जा करी लैता ऐ।

<><><><><><>

CS-GST Reforms

मुख्य सचिव अटल डुल्लू होरें समूलचे जम्मू-कश्मीर च जीएसटी सुधारें तैहत टैक्स दी नमी दरें गी लागू करने ते असरदार अमलावरी बारै जायजा लैने लेई इक समीक्षा बैठक दी अध्यक्षता कीती जेदा मकसद आम लोकें पर महंगाई दे भार गी घट्ट करना ते मकामी अर्थ बवस्था गी मजबूत करना ऐ। बैठक दरान मुख्य सचिव होरें प्रदेश दे

कर विभाग, मैहकमा नापतोल, उद्योग ते बपार सरबन्धी विभाग ते दोआइयें ते खाद्य नियंत्रण संगठन आसेआ पुट्टी जा'रदी गैऽ बारै जांच कीती। उनें इस गल्लै पर जोर दित्ता जे बजारें दी नियमित तौरा पर जांच कीती जा तां जे ग्राहकें कन्नै कुसै बी चाल्ली दी गड़बड़ी जा चलाकी नेई कीती जाई सकै ते समाज दे अखीरले माह्नु तोड़ी टैक्स दी दरें च होई दी कटौती दा लाह पुज्जी सकै।

<><><><><><>

CS-PMGSY

मुख्य सचिव अटल डुल्लू होरें समूलचे जम्मू-कश्मीर च प्रधानमंत्री ग्राम सड़क योजना तैहत जारी सड़कें ते पुलें दे निर्माण कम्में दी प्रगति ते रफ्तार दा जायजा लैता। इनें परियोजनाएं गी समेंसिर मुकम्मल करने दी जरूरतै पर जोर दिंदे होई उनें अधिकारिणं गी निर्देश दित्ता जे बकाया रौहंदे कम्में गी मिथे गेदे समेंसिर मुकम्मल करने लेई जवाबदेही तैह कीती जा। उनें सीनियर अफसरें गी निर्देश दित्ता जे सब्बनें कम्में पर बकायदगी कन्नै नेडमी तक्क रक्खी जा ते एहदे लेई फील्ड अमले गी नियमित तौरा पर मौके पर जाइयै जायजा लैने लेई आखेआ जा। मुख्य सचिव होरें आखेआ जे ग्रामीण इलाके धोड़ी सड़क संपर्क ते मजबूत ढांचागत सुविधा उपलब्ध कराना सरकार दी प्राथमिकता ऐ ते एहदे लेई ओहू पूरी चाल्ली बचनबद्ध ऐ। मीटिंगै च बक्ख-बक्ख कम्में दा ब्यौरा पेश करदे होई दस्सेआ गेआ ऐ जे सारे कम्में पर कम्म जारी ऐ ते मते सारे मुकम्मल होने दे कोलकाल न।

<><><><><><>

ते हुन बाकि दिणं खबरें कन्नै श्रुति खजूरिया।

BJP Names RS

24 अक्तूबर गी होने आहले राज्यसभा दे चुनांऽ लेई बीजेपी नै द'ऊं नमें चेहरें गी अपना मेदवार बनाया ऐ। पार्टी नै अज्ज अपने जम्मू-कश्मीर इकाई दे प्रधान सत शर्मा हुं'दे सने त्र'ऊं मेदवारें दे नाएं दी घोशणा कीती ऐ जिंदे च डॉ. अली मोहम्मद मीर ते राकेश महाजन शामिल न। तोआई, नेशनल कांफ्रेंस नै पैहले गै अपने त्रै मेदवारें दे नाएं दा ऐलान करी दित्ते दा ऐ जिंदे च चौधरी मोहम्मद, सज्जाद किचलू ते शम्मी आबराँय शामिल न। द'ऊं प्रमुख पार्टीं आसेआ मेदवारें दी घोशणा दे कन्नै गै एहू चुनांऽ हुन दिलचस्प मोड़ पर आई गेदा ऐ।

<><><><><><>

Landslide

उधमपुर जिले दे समरोली इलाके च ल्हास-पस्सियां पौने करी केई सारे कारोबारी इदारे गी नुकसान पुज्जा ऐ। एह घटना नारसू बजार कश अज्ज बडुलै साडे 11 बजे पेश आई। जम्मू-श्रीनगर राश्ट्री जरनैली शिड़क कश पेश आई दी इस घटना च केई सारी दुकानें ते हाल च खुल्ले दे होटल दी ईमारत गी नुकसान पुज्जा ऐ। एहदे च कुसै दे बी मारे जाने दी कोई खबर नेई ऐ। ल्हास-पस्सियां पौने थमां पैहले गै बजार गी पूरी चाल्ली खाली करोआई दित्ता गेदा हा।

<><><><><><>

JK Farmers PM

गांदरबल जिले थमां इक करसान फियाज अहमद होरें प्रधानमंत्री नरेंद्र मोदी हुंदे कन्नै पी.एम धन धान्य कृषि योजना दी शुरूआत दे मौके पर गल्ल कीती। उनें आधुनिक कृषि तौर-तरीके ते राई-बाई सरबन्धी नमिएं काह्डें गी अपनाने प्रति अपनी बचनबद्धता फही जाहिर कीती। धन धान्य कृषि योजना दी शुरूआत राई-बाई दी पैदावार गी बदाने, राई-बाई सरबन्धी विविधता, राई-बाई दे तौर-तरीके, सिंचाई सुविधा ते होरनें चीजें दी शुरूआत चुने गेदे 100 जिलें च कीती गेई ऐ। एहदे लेई 24 ज्हार करोड़ रपे रक्खे गेदे न। इस मौके पर बोलदे होई करसान नै आखेआ।

<><><><><><>

Army Commandent Rajouri Visit

सेना दी उत्तरी कमान प्रमुख लेफ्टिनेंट जनरल प्रतीक शर्मा होरें राजौरी जिले च तैनात बलें दी कारवाइएं ते तैयारिएं दा जायजा लैता। उत्तरी कमान दे जीओसी होरें बन्ने आहले जिले दे अगेत्रे इलाकें दा दौरा लाया ते सुरक्षा इंतजामें सने होरनें कारवाइएं दा जायजा लैता। उनें इस दरान उत्थे तैनात बलें कन्नै बी गल्ल कीती। इस मौके पर बोलदे होई बलें दी कारकरदगी ते मुश्कल हालात च पूरी निष्ठा कन्नै कम्म करने लेई सराहना कीती। पूरे

पेशेवराना रौंड अपनाने लेई बी बलें दी सिफत कीती। उत्तरी कमान प्रमुख होरें हर चुनौती कन्नै निब्वडने, म्हेशा तैयार रौह्ने ते फौरी कार्रवाई करने दी जरूरता पर जोर पाया।

<><><><><><>

NHM Jammu

जमीनी सतह पर सेहत सेवा गी मजबूत करने दे जत्तें दे इक हिस्से दे तोरा पर राश्ट्री सेहत मिशन (एन.एच.एम) जम्मू-कश्मीर दे मिशन निदेशक बसीर उल हक हुंदी अगुवाई च माली ब'रे 2026-27 लेई जिला जम्मू आस्तै जिला सेहत कार्य योजना दी समीक्षा कीती गेई। बैठक च कारवाइएं गी तरजीह देने ते जिले च जरूरी सेहत पहलकदमिं गी असरदार तरीके कन्नै लागू करने गी यकीनी बनाने पर ध्यान केंद्रित कीता गेआ। एह्दे अलावा सेहत सेवाएं गी बधाने, जच्चे-बच्चे दी सेहत च सुधार करने ते ग्रामीण सेहत सेवा दे विस्तार आस्तै रणनीतिएं पर बी चर्चा कीती गेई तां जे जिला योजना गी राश्ट्री सेहत उद्देश्यें कन्नै जोड़ेआ जाई सके ते पूरे खित्ते च बेहतर ते मती समावेशी सेहत सेवां उपलब्ध करोआई जाई सकन।

<><><><><><>

Test-Cricket

क्रिकेट च नमीं दिल्ली च खेड़े जा'रदे दुए टेस्ट मैच दे त्रीये ध्याड़े अज्जा दा खेड़ु मुक्कने तोड़ी अपनी दुई पारी च वेस्ट इंडीज नै 2 विकेटें दे नुकसान पर 173 रन्ज बनाए। हून ओहू भारत कोला 97 रन्ज पिच्छे ऐ। एह्दे शा पैहले भारत नै त्रीये ध्याड़े पैहली पारी च मेहमान टीम गी 248 रन्जें पर आउट करियै फॉलो ऑन आस्तै आखेआ हा। कुलदीप यादव नै 15 टेस्ट मैचें च इक पारी च 5 विकेटां हासल करने दा विश्व रिकार्ड कायम कीता। जिसले के रविंद्र जड़ेजा नै 3 विकेटां, मोहम्मद सिराज ते जसप्रीत बुमराह नै इक-इक विकेट हासल कीता। कल भारत नै अपनी पारी 5 विकेटें दे नुकसान पर 518 रन्ज पर घोषित करी दिती ही।

<><><><><><>